

Sra. Dora Koolman:

"FUNDACION TA APUNTO DI WORDE LANTA CU META FINAL UN CRISIS CENTRUM"

ORANJESTAD (AAN) -- E pregunta basico cu Sra. Dora Koolman a haci su mes, como punto di partida den e preparacion di un proyecto pa yuda combati maltrato domestico ta: pakico tin tanto agresion? Despues di a haci un estudio profundo di e materia y di conversa cu personanan cu ta traha riba tereno social, el a yega na un conclusion. E problema fundamental ta cu den hopi hogar, den e famia, eynan caba e hendenan muher (specialmente) ta worde maltrata. Un fundacion ta a punto di worde lanta, y e meta final ta: e creacion di un "Crisis Centrum".

"Esey ta e problema di mas grandi cu tin na Aruba. Ta un circulo vicioso cu si bo purba kibre, bo por bay crea un otro mentalidad. Un mentalidad unda nos yunan ta crece cu e pensamiento cu nos tur ta igual. Nos tur ta serman humano". Esaki ta e cosecha cu Sra. Dora Koolman kier sembra

den nos comunidad, door di suficiente semia cu por crea raiz profundo, pa un cambio di mentalidad y concientizacion sigui crece y yega na un y tur.

Un concientizacion riba e hecho cu tur ser humano, sea muher of homber tin sentimentonan, aunque nan por worde manifesta cu diferente intensidad.

"Hopi biaha e yiu homber ta worde crea pa e ta macho, pa e no yora, pa e domina su sentimentonan, pero e muher si mag ta cariñoso, humilde, suave.

Ami ta bisa semper laga nos hendenan muher keda un tiki mas duro".

Sra. Koolman no kiermeen cu hende muher mester deshaci di feminidad. No. Hende muher mester mantene e bunita virtud aki y no cu e bira "macho" pa demostra cu e ta igual cu hende homber, pero ta respet mutuo loke hende muher mester bringa pe.

"Mi ta bisa hende muher cu

ora cu e papia su opinion tambe mester conta. Hende homber mi ta bisa, muestra bo emocion".

E ta sigui bisa cu hopi hende homber tin un curazon sensible, pero pa muestra nan hombreza tin cu ta muestra agresivo di mas.

E parti di cultura aki, cu ta trece cune agresividad y violencia ta loke mester worde combati, pero trahando riba e derechonan di igualdad di hendenan muher.

PRIORIDAD: A base di investigacion, informacionan ricibi, yamada of bishitanan personal di hendenan muher cu ta confronta un of otro sorto di maltrato, señora Koolman por a saca su conclusion: e prioridad pa yuda hende muher cu ta worde maltrata fisica y mentalmente ta aumenta dia pa dia na Aruba.

CENTRO DI CRISIS: Sra. Dora Koolman ta trahando cu recursonan humano hopi valioso, conocedor di e situacion manera a menciona caba. Na e momentonan aki nan ta trahando riba establecimiento di un Centro di Crisis.

"E di bin cu un "Crisis Centrum" ta pa na momento cu hende muher haye den un situacion unda cu e ta worde maltrata, e por yega cerca nos y topa cu hende pa duna conseho y siña e camindanan pa cana".

Sra. Koolman ta menciona cu e proyecto aki no ta na un cumintamento pero mas bien ta cerca di worde termina.

"E fundacion aworaki ta na e punto pa worde lanta, asina leu nos ta".

Na dado momento el a yega di pensa cu esaki no tabata bayendo cu e rapidez cu e tabata desea. Pero despues

cu el a lesa un programa similar cu tin na Merca, el a bin haya sa cu e preparacion y ehecucion di un proyecto asina ta tuma hopi tempo.

Pero su preocupacion y deseo di haci algo cu rapidez ta cu desde e dia cu a sali den prensa cu un fundacion lo worde lanta el a cuminsa ricibi un avalancha di yamada di hendenan muher cu tin sed di ayudo, di serman humano "cu kier papia...".

CAMPAÑA DI CONCIERTIZACION: Sra. Koolman ta menciona cu pa haya bon resultadonan, prome cos cu tin cu haci ta concientiza e hendenan muher.

"Pasobra na final di cuenta cada hende muher mester responde pa su bida", e ta bisa. Esaki den sentido cu si ayudo ta worde duna na un hende muher maltrata pero esaki ta prefera pa e caso keda asina, y e no kier sigui e recomendacionnan, e Centro di Crisis no por haci nada pe.

"Peseu concientizacion ta hopi importante pa muestra e hende muher riba su propio valor, cu e no tin nodi di acepta desaroyonan asina; cu hasta e mester educa su yiu(nan) muher cu nan no tin cu acepta humiyacion, pero cu e mester exige cooperacion y respet di tur hende".

Sra. Koolman ta enfatico ora e bisa cu respet no mester ta pa hendenan cu tin posicion of cargonan halto den sociedad, pero pa un y tur como ser humano.

"Esaki nos mester cuminsa siña nos yunan desde chiquito caba. E respet entre serman humano a bay atras. Tin hende cu no tin respet ni pa nan mes, corda tin respet pa e prohimo?".

Si bo wak bon violencia ta

bira dia pa dia peor".

UN ASUNTO DI UN Y TUR: Un proyecto manera esaki no ta algo di un grupo of un personal, pero mas bien ta concerni henter e comunidad.

"Manera nos ta weita aworaki den medianan di prensa cu nan ta pone atencion y ta muestra riba e problema, y cu tin hendenan ta riesga di papia, pa ami ta un indicacion cu nan a cuminsa bira mas conciente y realiza cu e situacion no mester ta asina".

Loke ta sali afo den prensa door di informe policial ta apenas un tiki, Sra. Koolman ta bisa.

"Loke cu tin cu bin ta scondi ainda. Tin hopi hende muher cu ta bay cuminsa papia over di e problema".

Sra. Koolman ta mira e situacion di maltrato como uno cu no ta encera solamente maltrato domestico, pero ta bay mucho mas leu.

Por a conclui di e conversacion aki cu acosamento sexual contra hende muher sea na trabao, riba caminda y otro sorto di abuso cu tin di haber cu falta di igualdad di derecho hasta den e plano profesional, ta forma parti di henter e contexto unda cu hende muher, di un of otro manera ta keda den desventaja compara cu e sexo masculino.

Logicamente sin generaliza. Tin hende homber cu ta compronde caba e situacion y cu riba nan propio iniciativa a bin cu un cambio di actitud, pero ainda ta keda un caminda largo pa cana pa un cambio di mentalidad asina bira parti di cultura.

Riba e caminda aki e trabao di Sra. Koolman y e equipo di dama cu ta trahando cune ta dirigi su esfuerzonan.